

Resolución lumero: 65

Asunto: A *-r-* interbocalica.

Calendata: 2012 (aprebación en redazón probisional o 27.12.2012)

Publicación en a suya redazón probisional: *Fuellas*, 212 (nobiembre-abiento 2012), p. 31. Redazón definitiba publicata en *Luenga & fablas*, 17-18 (2013-2014), p. 153.

Testo d'a resolución:

En os casos en que bi ha formas tanto con *-r-* como sin *-r-* interbocalica, ye consellable dar preferenzia a ras formas con *-r-*, por representar millor o conchunto fonico completo. Asinas, ye preferible *parexer* u *parixer* (fren a *paixer* u *paizer*), *mira-te* (fren a *mia-te*), *troboron* (fren a *trobón*), *metioron* (fren a *metión*), *encara* (fren a *encá*), *por astí* (fren a *po astí* u *pu astí*), etc.

Chustificación:

A ormino se produze, por relaxamiento d'a prenunzia a cayedura d'a *-r-* interbocalica (u si no a cayedura, a prenunzia floxa, cuasi imperzeutible). Isto se produze bellas bezes, en bellas palabras u en bellas redoladas; pero no pas siempre ni en toz os puestos. Asinas, bi ha formas doples como *parexer* u *parixer* fren a *paixer* u *paizer*; u como *encara*, fren a *encá* (que puede esplicar-se tamién como un alcorzamiento); u como as formas d'a tercera persona de plural d'o preterito indefinito (sintetico), por exemplo, *troboron* fren a *trobón*, *puyoron* fren a *puyón*, *dizioron* fren a *diziión*, etc. —que pueden combibir en o mesmo puesto u en puestos zercanos—, formas en as que puede que tenga que beyer tamién a fuerza de l'analochía en a conchugación berbal (3 *trobó* → 6 *trobón*).

En cheneral, a no reyalización d'a *-r-* interbocalica reflexa una prenunzia relaxata u floxa. Ye esplicable foneticamén por o caráuter d'as liquidas, entre as consonans propiamén ditas e as bocals. As formas con *-r-* interbocalica prenunziata representan millor e de forma más completa o conchunto fonico d'a palabra. Que se prenunzie claramén a *-r-* u se prenunzie más u menos relaxata, u —indo enta ro extremo— prauticamén inaudible, ye un feito de fabla, de parola (en o sentito saussuriano de *parole*), que se da más que más en a fabla coloquial u escudiata. Creyemos que en una mena de luenga cudiata e de rechistro alto u culto, cal prenunziar —con más u menos fuerza— a *-r-* interbocalica, e asinas mesmo cal reflexar-la en a escritura. Por tanto, será preferible escribir *troboron* fren a *trobón*, *dizioron* fren a *diziión*, *encara* fren a *encá*, *parexer* u *parixer* fren a *paixer* u *paizer*, etc. (a no estar, como ye de dar, que se prebe de reflexar una prenunzia dialeutal u coloquial, en contraste con a luenga común de rechistro alto u culto).